

Broj: 01-02-3-1390/17
Sarajevo, 10.09.2017. godine

Z A P I S N I K
23. REDOVNE SJEDNICE PREDSTAVNIČKOG DOMA PARLAMENTA FEDERACIJE
BIH, održane 25. i 26.07.2017. godine

Sjednica je počela u 12 sati.

Sjednici je predsjedavao predsjedavajući Predstavničkog doma Parlamenta Federacije BiH Edin Mušić.

Predsjedavajući Mušić pozdravio je zastupnice i zastupnike, članove Vlade Federacije BiH, goste kao i predstavnike akreditiranih medijskih kuća koji prate rad sjednice.

Odsustvo sa sjednice opravdali su: Ilhan Bušatlić, Alma Aranut, Dževad Hodžić, Boro Krišto, Ljuban Herceg a kašnjenje je najavio Rusmir Mesihović.

Prema evidenciji Stručne službe, predsjedavajući je konstatovao da sjednici prisustvuje dovoljan broj zastupnika za kvalitetan rad i odlučivanje.

Zapisnici 19. redovne sjednice i Tematske sjednice „Stanje u poljoprivredi Federacije BiH” usvojeni su bez primjedbi.

Predsjedavajući je kazao da je Predstavnički dom u sklopu zaključaka usvojenih na tematskoj sjednici, vezano uz izgradnju autoceste Koridor Vc i stanju u Autocestama Federacije BiH, zadužio Komisiju za loklanu samoupravu, Odbor za promet i komunikacije i Odbor za prostorno uređenje stambeno-komunalnu politiku ekologiju i turizam da Domu predlože trasu brze ceste Sarajevo-Beograd. Radna tijela su na zajedničkoj sjednici usvojili zaključak, kojim su predložili trasu brze ceste Sarajevo-Beograd i uputili je Domu na usvajanje.

Sa 51 glasom za, uz šest glasova protiv i uz sedam uzdržanih glasova, usvojena je trasa brze ceste Sarajevo – Zenica – Žepče – Tuzla – Brčko – Bijeljina – Ruma – Beograd.

Alma Kratina pokrenula je inicijativu o kojoj su se zastupnici izjašnjavali.

Sa 60 glasova za, uz tri glasa protiv i uz 11 uzdržanih glasova, usvojena je sljedeća:

I N I C I J A T I V A

Za ostvarivanje prava na osiguranje plaćenog odsustva s posla za hranitelje djece bez adekvatnog roditeljskog staranja, bez obzira na uzrast djeteta, koje je smješteno u hraniteljsku porodicu kao i dodatno preciziranje da hranitelj ovo pravo stječe danom donošenja privremenog rješenja o hraniteljstvu, tj. danom dolaska djeteta na adaptaciju u porodicu hranitelja. Prijedlog trajanja plaćenog odsustva hranitelja je: za šest mjeseci za hranjenika mlađeg od tri godine; pet mjeseci za hranjenika u životnoj dobi od tri do navršanih pet godina i četiri mjeseca za hranjenika u životnoj dobi od pet do 18 godina života.

Dževad Adžem pokrenuo je inicijativu (prema zastupnicima Doma za donošenje zaključka kojim će Predstavnički dom obavezati Vladu Federacije BiH da prije Rebalansa Budžeta Federacije BiH za 2017. godinu, Projekt izgradnje brze ceste na relaciji Prača – Tunel Hranjen - Goražde uvrsti u Program javnih investicija Vlade Fedracije BiH za srednjoročni period 2017.-2019. godina), koja nije usvojena (40 glasova za, 17 glasova protiv i 14 uzdržanih glasova).

Faruk Ćupina predložio je zaključak.

Na osnovu pojedinačnog izjašnjavanja, sa 68 glasova za, uz jedan glas protiv i uz osam uzdržanih glasova, usvojen je sljedeći:

ZAKLJUČAK

Predstavnički dom Parlamenta Federacije BiH obavezuje Federalno ministarstvo pravde da u razumnom vremenskom roku pristupi usklađivanju vrednovanja notarskih i advokatskih tarifnih naknada za pravne poslove sastavljanja isprava pravnog prometa u Federaciji BiH.

Zastupnička pitanja

Damir Mašić prvo pitanje uputio je predsjedniku Federacije BiH Marniku Čavari – zašto nije potpisao ukaz za Rezoluciju Predstavničkog doma Parlamenta Federacije BiH o osudi inicijativa za federalizacijom države i entiteta sa ciljem etno-nacionalnih podjela i snaženja separatističkih tendencija, koju je usvojio Predstavnički dom zbog objavljivanja u „Službenom glasniku“ i traži od predsjedavajućeg da napomene predsjednika, te ako ne potpiše, a što je dužan uraditi, kazao je da će biti prisiljen da podigne krivičnu prijavu zbog zloupotrebe položaja i funkcije koju vrši.

Drugo pitanje uputio je predsjedavajućoj Doma naroda, koja je potvrdila da ima određeni broj zakona koji nisu još u proceduri ovog doma – koliko slovom i brojem zakona stoji u ladici Lidije Bradara a koji su usvojeni u Predstavničkom domu? Kazao je da predsjedavajuća na taj način blokira njihovu daljnju proceduru. Ako predsjedavajuća ne pusti ove zakone u proceduru, kazao je da će biti prisiljen podići krivičnu prijavu protiv nje.

Posljednje pitanje uputio je Federalnom ministarstvu rada i socijalne politike a vezano je uz revizorski izvještaj za 2016. godinu Ureda za reviziju institucija Federacije BiH, gdje piše da je Ministarstvo u 2016. godini potrošilo više od 100.000 KM na ugovore o djelu. U izvještaju je i opaska revizora da se radi o poslovima za koje već postoje sistematizirana radna mjesta i radna mjesta na kojima već zaposlenici rade. Pita resornog ministra – šta je poduzeo nakon ovog revizorskog izvještaja i zašto je bilo neophodno da se toliki iznos sredstava potroši na ugovore o djelu. Također, ako ima još institucija i ustanova u Federaciji BiH koje imaju ugovore o djelu pita - koliko ima ugovora o djelu, ko su te osobe, na koji iznos i na koji period su im potpisani ugovori o djelu?

Kazao je predsjedavajućem Doma da je prije dva i pol sata predao inicijativu za dopunu dnevnog reda koji još nije podjeljen, te ga je zamolio da naloži da se podijeli zastupnicima.

Jusuf Bubica podnio je četiri inicijative.

Prva inicijativa, kojom traži da se ukinu subвенicije radno sposobnom stanovništvu te da se na taj način uštedena sredstva usmjere na dječije doplatke.

Druga inicijativa, kojom traži da se ujedine dvije elektroprivrede u BiH.

Treća inicijativa, kojom traži da se izradi i na internetu objavi registar boraca po kategorijama.

Četvrta inicijativa, kojom traži da se ukine penzionisanje pod posebnim uvjetima.

Zukan Helez pitanje je uputio predsjedniku Visokog sudskog i tužiteljskog vijeća – da li se šumska krađa smatra kao privredni kriminal i u kojim procentima?

Jozo Bagarić uputio je prvo pitanje vezano uz događaje od 05.07.2017. godine kada je bila ugrožena sigurnost predsjednika Federacije BiH Marinka Čavare. Pored toga postoje informacije o nezakonitom praćenju i prisluškivanju predsjednika Čavare. Traži od nadležnih institucija da dostave informaciju šta su poduzeli o razotkrivanju počinitelja i eventualnih organizatora navedenih aktivnosti, te šta su poduzeli na osiguranju predsjednika Marinka Čavare. Odgovore traži od Vlade Federacije BiH, MUP-a FBiH i nadležnog tužiteljstva, kao i od sigurnosnih agencija BiH.

Drugo pitanje odnosi se na vijest koja se tiče iskopa zlata u naselju Bakovići, Općina Fojnica. Pitanje postavlja Vladi Federacije BiH, Federalnom ministarstvu energije, rudarstva i industrije, Federalnom ministarstvu prostornog uređenja, Federalnoj upravi za inspeksijske poslove, Skupštini Srednjobosanskog kantona, Ministarstvu prostornog uređenja, građenja i zaštite okoliša Srednjobosanskog kantona, Općinskom vijeću i načelniku Općine Fojnica, te traži odgovor vezano uz informiranost i uključenost u ovaj slučaj, poštivanju zakonskih procedura i propisanih uvjeta za iskopavanje zlata, pravomoćnosti i svrsi izdatih rješenja i

odobrenja, te izvršenih inspekcijskih pregleda i nalaza u vezi sa iskopavanjem zlata u naselju Bakovići Općina Fojnica.

Elma Đogić kazala je da je za današnju sjednicu pripremila četiri pitanja. Tri će predati u pisanoj formi a jedno postavlja usmenim putem Javnom preduzeću Direkcija cesta Federacije. Naime, Savjet za regulaciju saobraćaja Općine Velika Kladuša je u nekoliko navrata pisanim putem od Direkcije cesta zatražio poduzimanje mjera radi unapređenja sigurnosti odvijanja saobraćaja na dijelu magistralne ceste M42, koja prolazi gradskim središtem, ali i kroz teritoriju Općine Velika Kladuša. Da li su upoznati sa pisanim podnescima koje je uputio Savjet za regulaciju saobraćaja Općine Velika Kladuša i šta se planira poduzeti u cilju rješavanja zahtjeva i poduzimanja mjera koje su u okviru njihove nadležnosti?

Oliver Radoš jedno pitanje uputio je Federalnom ministarstvu za pitanja branitelja – koliko je zaposlnih u ovom ministarstvu i koja je nacionalna struktura?

Slavica Josipović pitanje je uputila Razvojnoj banci Federacije BiH – koliko je odobrila kredita prema konkursima koje raspisuje i traži da joj se dostavi spisak po kantonima Federacije BiH.

Mensud Borović pokrenuo je inicijativu da Vlada Federacije BiH u parlamentarnu proceduru dostavi prijedlog Zakona o finansiranju nerazvijenih općina u Federaciji BiH kao poseban zakon ili kao dio Zakona o pripadnosti javnih prihoda u Federaciji BiH, kojim bi se sistematski uredilo pitanje osiguranja nedostajućih sredstava za određene općine za izvršavanje osnovnih funkcija jedinica lokalne samouprave proisteklih iz Ustava Federacije BiH, ustava i zakona kantona.

Midhat Karović pitanje je postavio federalnom ministru unutrašnjih poslova i direktoru Federalne uprave policije a u vezi sa okončanjem procedure izbora policijskih službenika u FUP-u, po poništenom pa ponovo raspisanom konkursu. Da li je izvršen pravilan izbor 15 kandidata od 50 prijavljenih kandidata sa liste koji su uspješno završili testiranje?

Traži da mu se dostavi ocjena svih članova komisije koje su vršile testiranje kandidata sa liste koja je dostavljena 14.07.2017. godine i da li je ispoštovan nacionalni balans. Traži podatke o kompletnom bodovanju kandidata pod šifrom 021 u čije bodovanje izražava sumnju i smatra da je prema nacionalnom balansu oštećen. Također, traži izmjenu člana 4. Zakona o policijskim službenicima Federacije BiH, koji se odnosi na nacionalnu zastupljenost policijskih službenika.

Jasmin Kadić ponovio je pitanje upućeno Elektroprivredi BiH na koje nije dobio odgovor – da li planiraju i da li će uputiti svoj zahtjev prema nadležnim instancama kao što je Regulatorna agencija za povećanje cijene električne energije, budući da su svojim internim dokumentom planirali da gubitak od 18,5 miliona KM jednim dijelom namire povećanjem cijene električne energije za domaćinstva i ostale potrošače?

Da li su još na snazi ugovori o nabavci uglja za termoelektrane, prema kojima se isplaćuju premije na osnovu kvalitetnije isporučenog uglja i koliko je na ime premija na osnovu kvalitetnijeg isporučenog uglja isplaćeno u 2016. godini?

Pitanje je uputio Vladi Federacije BiH da li će se i kada izjašnjavati o inicijativi koju je pokrenuo a koja se odnosi na donošenje odluke Vlade Federacije BiH da se smijene direktori javnih preduzeća koji su negativno poslovali u tekućoj godini?

Pita predsjedavajućeg kada će se na dnevnom redu naći izvještaji javnih preduzeća Elektroprivreda BiH i HZHB?

Boris Barun prvo pitanje uputio je Vladi i federalnom ministru unutrašnjih poslova – u kojoj odredbi Ustava Federacije BiH su našli ustavno utemeljenje za donošenje rješenja o imenovanju radne grupe za izradu prednacrtu Zakona o javnom okupljanju, donesenog na 90. sjednici Vlade Federacije BiH, održanoj 10.02.2017. godine?

Drugo pitanje uputio je Visokom sudskom i tužiteljskom vijeću BiH – šta je navedena institucija poduzela u vezi sa prijavama koje su podnesene protiv sudije Općinskog suda u Livnu, odjeljenje u Drvaru, Dragana Čampare, koji uporno imenuje u svim predmetima gdje za to postoji potreba dva ista vještaka geodetske struke, Stevu Bursaća i Đurađa Kopanju, koji nisu na listi imenovanih vještaka.

Amra Kunovac prvo pitanje uputila je Ministarstvu rada i socijalne politike a vezano je uz Zavod za zbrinjavanje mentalno invalidne djece i omladine u Pazariću. Traži da joj Ministarstvo dostavi sistematizaciju radnih mjesta, broj zaposlenih i stručnu spremu u Zavodu.

Drugo pitanje vezano je uz naselje Ramiće, koje je prošle godine otvoreno, a još nikad u njega nisu uselili štíćenici, te pita zašto? Da li u istom Zavodu postoje individualni planovi za korištenje?

Amra Haračić pitanje je uputila Federalnom ministarstvu turizma i okoliša, te napomenula da je Predstavnički dom usvojio zaključke o zagađenosti zraka u Federaciji BiH. Zaključkom broj 3 Dom je obavezao Federalno ministarstvo turizma i okoliša da u roku tri mjeseca u pogledu sankcija sve zakone koji reguliraju oblast okoliša uskladi sa Zakonom o prekršajima Federacije BiH. Budući da je taj rok istekao zahtjeva od Federalnog ministarstva da Parlamentu dostavi informaciju o poduzetim aktivnostima po navedenom zaključku a i po ostalim zaključcima koje je Dom usvojio.

Jasmina Zubić pokrenula je inicijativu prema Vladi Federacije BiH i Federalnom ministarstvu prostornog uređenja i okoliša da se u Program prioriteta zaštite i obnove nacionalnih spomenika uvrsti Crkva sv. Prokopija u Visokom.

Naredno pitanje uputila je menadžmentu Kliničkog centra Univerziteta u Sarajevu – kada će staviti u funkciju barokomore i aparate za artroskopiju, koji su namijenjeni pacijentima sa komplikacijama šećerne bolesti i cirkulacijskog sistema.

Posljednje pitanje vezano je uz odgovor na pitanje koje je ranije postavljala a tiče se primjene liste invaliditeta i usvajanje novog Pravilnika o kriterijima i postupku medicinskog vještačenja i zdravstvenog stanja. Ponovo upućuje pitanje Upravnom odboru Instituta za medicinsko vještačenje - zašto neki članovi Upravnog odbora Instituta za medicinsko vještačenje odbijaju prihvatiti dogovorene izmjene i dopune Pravilnika koje su usaglašene, uz mišljenje nadležnih ministarstava po njihovim zahtjevima i insistiraju na uklanjanju Institucije vještaka kontrolora što je u suprotnosti sa Zakonom o osnivanju Instituta za medicinsko vještačenje zdravstvenog stanja.

Jasna Duraković-Hadžomerović izrazila je nezadovoljstvo u vezi sa organiziranjem okruglog stola od potpredsjednice Federacije BiH Melike Mahmutbegović jer nijedna žena iz Kluba zastupnika SBB nije pozvana. Također, nije ni Komisija za jednakopravnost spolova dobila zvaničan poziv i traži objašnjenje.

Nermin Nikšić kazao je da je na sjednici Vlade Federacije BiH data saglasnost Privrednom društvu „Pobjeda Technology“ d.d. Goražde za proširenje proizvodnog kapaciteta proizvodima i komponentama definiranim kao vojna oprema. Ova saglasnost podrazumijeva definiranje vojne opreme iz kontrolnog broja ML3 sa zajedničke liste vojne opreme prema stavki ML1. Interesira ga koji to interes rukovodi Vladu da ovakvom odlukom pravi konkurenciju svojoj firmi JP „Igman“ Konjic. Umjesto da zapošljava novih 500 radnika u „Igmanu“, ovakvom odlukom direktno urušava i ugrožava poslovanje svoje firme.

Drugo pitanje se, također, odnosi na firme namjenske industije. Na sjednicama Vlade odobrena su grant sredstva za podršku firmama namjenske industrije. Podsjetio je da je vlasnička struktura u tim firmama 51% Federacija BiH a 49% fondovi i privatni kapital. Traži odgovor – na osnovu kojih propisa Vlada daje grant sredstva, te se time podržavaju oni koji su vlasnici 49%, odnosno ta sredstva su im poklonjena.

Komentirao je navode u medijima da je predsjednik Federacije iskazao strah za svoju sigurnost. Pita – otkuda to da predsjednik Federacije kao štíćena ličnost vozi službeno vozilo? Da li je imao putni nalog kada je upravljao službenim vozilom, te šta bi se desilo da je napravio udes, ko bi tada odgovarao?

Azra Hadžić traži od Federalnog ministarstava poljoprivrede, vodoprivrede i šumarstva da joj dostavi spisak korisnika novčane podrške u proteklih šest godina, čiji iznos prelazi 500.000KM po svim osnovama. Podaci treba da sadrže naziv korisnika, općinu, kanton, vrstu podrške za koju korisnik ostvaruje iznos u KM, godinu u kojoj je isplaćena podrška, otkupljivač proizvodnje ako se radi o proizvodnji i zbirni iznos za proteklih šest godina.

Drugo pitanje - traži od Tužilaštva Kantona Sarajevo izvještaj koliko ima krivičnih prijava sa osnovanom sumnjom da je počinjeno krivično djelo, a koje se odnose na

nezakonitu raspodjelu sredstava namjenjenih za poljoprivredu i ruralni razvoj, godine kada su podnesene krivične prijave, pokretanje istrage te šta se do sada uradilo po tom pitanju?

Prešlo se na izmjene i dopune dnevnog reda.

Rukovodstvo Doma predložilo je zaključak o kojem su se zastupnici izjašnjavali.

Sa 54 glasa za, uz tri glasa protiv i uz jedan uzdržani glas, usvojen je sljedeći:

Z A K L J U Č A K

Predstavnički dom Parlamenta Federacije BiH traži od Agencije za bankarstvo Federacije BiH, koja aktivno nadzire proces konverzije, te raspolaže svim relevantnim podacima uključujući i broj preostalih kredita, preciznu informaciju o stanju konverzije kredita kod Addiko banke (Hypo Alpe - Adria bank) CHF u KM sa danom 31.07.2017. godine za period od usvajanja Nacrta Zakona o konverziji kredita sa valutnom klauzulom u švicarskim francima (CHF) u konvertibilne marke (KM).

Navedenu informaciju dostaviti Parlamentu Federacije BiH do 31.08.2017. godine.

U raspravi o izmjenama i dopunama dnevnog reda učestvovali su: Elvir Karajbić, Sanel Razić, Damir Mašić, Jasmin Kadić, Mira Grgić, Jozo Bagarić i Vjekoslav Bakula.

Sa 55 glasova za, uz šest glasova protiv i bez uzdržanih glasova, usvojen je prijedlog da se u dnevni red uvrsti tačka – Prijedlog Zakona o izmjenama i dopunama Zakona o posebnim pravima dobitnika ratnih priznanja i odlikovanja i članova njihovih porodica – skraćeni postupak.

Sa 55 glasova za, uz pet glasova protiv i uz jedan uzdržani glas, usvojen je prijedlog da se u dnevni red uvrsti tačka – Prijedlog Zakona o izmjenama i dopunama Zakona o prijevremenom povoljnijem penzionisanju branilaca odbrambeno-oslobodilačkog rata – skraćeni postupak.

Sa 58 glasova za, uz tri glasa protiv i tri uzdržana glasa, usvojen je prijedlog da se u dnevni red uvrsti tačka – Prijedlog Zakona o izmjenama i dopunama Zakona o pravima branilaca i članova njihovih porodica.

Na osnovu pojedinačnog izjašnjavanja, sa 48 glasova za, uz 19 glasova protiv i uz 10 uzdržanih glasova, nije usvojeno da se u dnevni red uvrsti tačka – Prijedlog Zakona o izmjeni Zakona o finansijskoj konsolidaciji privrednih društava u Federaciji BiH.

Elvir Karajbić je, u ime Kluba zastupnika SDP, predložio da se u dnevni red uvrsti tačka - Prijedlog Zakona o izmjenama i dopunama Zakona o PIO Federacije BiH - što je, sa 50 glasova za, uz 14 glasova protiv i uz devet uzdržanih glasova, usvojeno.

Sanel Razić je, u ime Kluba zastupnika SBB, predložio da se doda u okviru 11 tačke. pod b) Zaključak o provođenju presude Ustavnog suda U-15/10 od 02.12.2015. godine, što je usvojeno (59 glasova za, jedan glas protiv i sedam uzdržanih glasova).

Damir Mašić predložio je da se kao tačka dnevnog reda uvrsti – Predstavnički dom Parlamenta Federacije BiH zadužuje Vladu Federacije BiH da u roku 60 dana putem upravljačkih struktura u javnim preduzećima iz nadležnosti Vlade Federacije BiH i preduzeća sa većinskim državnim kapitalom u kojima prava upravljanja vrši Vlada Federacije BiH osigura brisanje svih nacionalnih prefiksa iz njihovih naziva kroz odgovarajuće izmjene statutarnih i drugih potrebnih akata u tim javnim preduzećima, ta da o tome podnese pisani izvještaj Parlamentu Federacije BiH, a što pojedinačnim izjašnjavanjem nije usvojeno (41 glas za, 13 glasova protiv i 24 uzdržana glasa).

Damir Mašić je, također, predložio da se 9. tačka - Nacrt Zakona o izmjenama i dopunama Zakona o Javnom RTV servisu Federacije BiH (predlagači: Tomislav Martinović i Jozo Bagarić) skine sa dnevnog reda - što nije usvojeno (29 glasova za, 14 glasova protiv i 19 uzdržanih glasova).

Zastupnik Mašić izrazio je sumnju u rezultate glasanja i tražio pojedinačno izjašnjavanje. Usljedila je diskusija u kojoj su učestvovali: Damir Mašić, Ismet Osmanović, Mladen Bošković, Jozo Bagarić i Elvir Karajbić.

U ime Kluba zastupnika HDZBiH Jozo Bagarić zatražio je pauzu 15 minuta.

Data je pauza 15 minuta.

Nakon pauze, koju je zastupnik Bagarić tražio radi dodatnih konsultacija, nastavljena je diskusija u kojoj su učestvovali: Damir Mašić, Dževad Agić, Safet Kešo i Elvir Karajbić.

Nakon diskusije i na osnovu pojedinačnog izjašnjavanja, sa 48 glasova za, uz 12 glasova protiv i uz 19 uzdržanih glasova, nije usvojeno da se 9. tačka - Nacrt Zakona o izmjenama i dopunama Zakona o Javnom RTV servisu Federacije BiH (predlagači: Tomislav Martinović i Jozo Bagarić) - skine sa dnevnog reda.

Jasmin Kadić predložio je da se u dnevni red uvrsti tačka – Prijedlog Zakona o konverziji kredita sa valutnom klauzulom u švicarskim francima (CHF) u konvertibilne marke (KM) - što pojedinačnim izjašnjavanje nije usvojeno (48 glasova za, dva glasa protiv i 29 uzdržanih glasova).

U ime Komisije za lokalnu samoupravu Mira Grgić predložila je da se sa dnevnog reda skine 8. tačka - Nacrt Zakona o izmjenama i dopunama Zakona o zaštiti od požara i vatrogastvu - što nije usvojeno (39 glasova za, 16 glasova protiv i devet uzdržanih glasova).

Sa 53 glasa za, uz 15 glasova protiv i uz 11 uzdržanih glasova, usvojen je sljedeći:

D N E V N I R E D

1. Prijedlog Zakona o izmjenama i dopunama Zakona o posebnim pravima dobitnika ratnih priznanja i odlikovanja i članova njihovih porodica - skraćeni postupak,
2. Prijedlog Zakona o izmjenama i dopunama Zakona o prijevremenom povoljnijem penzionisanju branilaca odbrambeno-oslobodilačkog rata - skraćeni postupak,
3. Prijedlog Zakona o izmjenama i dopunama Zakona o pravima branilaca i članova njihovih porodica - skraćeni postupak,
4. Prijedlog Zakona o izmjenama i dopunama Zakona o penzijskom i invalidskom osiguranju Federacije BiH (predlagač): Klub zastupnika SDP-a – skraćeni postupak,
5. Prijedlog Zakona o izmjeni Zakona o tržištu vrijednosnih papira (predlagač: Dennis Gratz) - skraćeni postupak,
6. Prijedlog Zakona o izmjenama i dopunama Porodičnog zakona Federacije BiH (predlagač: Dennis Gratz) – skraćeni postupak,
7. Prijedlog Zakona o izmjeni i dopuni Zakona o vanparničnom postupku (predlagač: Faruk Čupina) – skraćeni postupak,
8. Prijedlog Zakona o izmjenama Zakona o suzbijanju korupcije i organiziranog kriminala u Federaciji BiH,
9. Prijedlog Zakona o Fondu za zaštitu okoliša i energetske efikasnost Federacije BiH,
10. Nacrt Zakona o izmjenama i dopunama Zakona o zaštiti od požara i vatrogastvu,
11. Nacrt Zakona o izmjenama i dopunama Zakona o Javnom servisu RTVFBiH (predlagači: Tomislav Martinović i Jozo Bagarić),
12. Prijedlog Odluke o prihvatanju zaduženja po Ugovoru o zajmu između BiH i Evropske banke za obnovu i razvoj (EBRD) za realizaciju Projekta Vodovod Visoko,
13. Provođenje odluka Ustavnog suda BiH:
 - a) Zaključak o provođenju odluke Ustavnog suda BiH broj U-20/16 od 30.03.2017. godine,
 - b) Zaključak o provođenju presude Ustavnog suda FBiH broj U-15/10 od 02.12.2015. godine,
14. Prijedlog za izglasavanje nepovjerenja Vladi Federacije BiH (predlagač: grupa zastupnika),
15. Usaglašavanje tekstova zakona različito usvojenih u domovima Parlamenta Federacije BiH,
16. Izbori i imenovanja.

Prije nego se prešlo na rad po 1. tački dnevnog reda predsjedavajući je predložio zaključak kojim bi se na tač. 1., 2., 3. i 4. mogli podnositi amandmani do kraja pretresa ovih tačaka, što nije usvojeno (42 glasa za, 14 glasova protiv i šest uzdržanih glasova).

1. Prijedlog Zakona o izmjenama i dopunama Zakona o posebnim pravima dobitnika ratnih priznanja i odlikovanja i članova njihovih porodica - skraćeni postupak

Prijedlog Zakona utvrdila je Vlada Federacije BiH.

Prijedlog Zakona razmarala su nadležna radna tijela i dostavila izvještaje.

Prije otvaranja pretresa predsjedavajući je, na osnovu člana 172. stav 3. Poslovnika, kazao da se ne radi o složenom i obimnom Prijedlogu Zakona te pozvao zastupnike da se izjasne da li će se razmatrati po skraćenom postupku, što je usvojeno (57 glasova za, 10 glasova protiv i sedam uzdržanih glasova).

U raspravi niko nije učestvovao.

Sa 61 glasom za, uz četiri glasa protiv i uz tri uzdržana glasa, usvojen je Prijedlog Zakona o izmjenama i dopunama Zakona o posebnim pravima dobitnika ratnih priznanja i odlikovanja i članova njihovih porodica.

2. Prijedlog Zakona o izmjenama i dopunama Zakona o prijevremenom povoljnijem penzionisanju branilaca odbrambeno-oslobodilačkog rata - skraćeni postupak

Prijedlog Zakona utvrdila je Vlada Federacije BiH.

Prijedlog Zakona razmatrala su nadležna radna tijela i dostavila izvještaje.

Prije otvaranja pretresa predsjedavajući je, na osnovu člana 172. stav 3. Poslovnika, kazao da se ne radi o složenom i obimnom Prijedlogu Zakona te pozvao zastupnike da se izjasne da li će se razmatrati po skraćenom postupku, što je, sa 62 glasa za, uz tri glasa protiv i uz sedam uzdržanih glasova, usvojeno.

Na Prijedlog Zakona zastupnica Jasmina Zubić podnijela je jedan amandman (odnosi se na član 4.), koji Vlada nije prihvatila.

U raspravi su učestvovali: Jasmina Zubić, Nermin Nikšić i ministar Salko Bukvarević.

Ministar Bukvarević naveo je tehničke ispravke u Prijedlogu Zakona: u članu 2. stav (3) pod a) broj: „2017.“ zamijeniti brojem: „2018.“, pod b) broj: „2018.“ zamijeniti brojem: „2019.“ i pod c) broj: „2019.“ zamijeniti brojem: „2020.“.

Budući da zastupnica Zubić nije prihvatila izjašnjenje Vlade o amandmanu, zastupnici su se o njemu izjašnjavali, te amandman nije usvojen (38 glasova za, devet glasova protiv i 21 uzdržani glas).

Sa 73 glasa za, uz jedan glas protiv i bez uzdržanih glasova, usvojen je Prijedlog Zakona o izmjenama i dopunama Zakona o prijevremenom povoljnijem penzionisanju branilaca odbrambeno-oslobodilačkog rata.

3. Prijedlog Zakona o izmjenama i dopunama Zakona o pravima branilaca i članova njihovih porodica - skraćeni postupak

Prijedlog Zakona utvrdila je Vlada Federacije BiH.

Prijedlog Zakona razmarala su nadležna radna tijela i dostavila izvještaje.

Prije otvaranja pretresa predsjedavajući je, na osnovu člana 172. stav 3. Poslovnika, kazao da se ne radi o složenom i obimnom Prijedlogu Zakona te pozvao zastupnike da se izjasne da li će se razmatrati po skraćenom postupku, što je, sa 62 glasa za, uz četiri glasa protiv i uz pet uzdržanih glasova, usvojeno.

U ime Vlade Federacije BiH dodatno obrazloženje dao je ministar Salko Bukvarević.

Na Prijedlog Zakona tri amandmana podnio je Klub zastupnika HDZBiH, koje je Vlada prihvatila pa su postali sastavni dio Prijedloga Zakona (Amandman I.: u članu 8. stav 2. mijenja se i glasi:

„Revizorski tim za koordinaciju izvršit će kontrolu svih uvjerenja na osnovu kojih su ostvarena prava za osobe ili članove porodica osobe iz stava 1. tač. 3. i 4. člana 36.“.

Amandman II.: U članu 55a. u stavu 2. iza riječi: „populacije“ ostatak teksta se briše.

Amandman III.: U članu 55b. u stavu 3. riječi: „ objavu podataka iz jedinstvenog registra“ se brišu i na kraju teksta dodaju riječi: „koji će biti dostupan svim nivoima vlasti u Federaciji Bosne i Hercegovine“.

U raspravi su učestvovali Helez Zukan i Dževad Adžem.

Predsjedavajući je pozvao zastupnike da se izjasne o Prijedlogu Zakona. Nakon glasanja Jozo Bagarić je, u ime Kluba zastupnika HDZBiH, tražio pojedinačno izjašnjanje.

Na osnovu pojedinačnog izjašnjanja, sa 50 glasova za, uz 19 glasova protiv i uz jedan uzdržani glas, usvojen je Prijedlog Zakona o izmjenama i dopunama Zakona o pravima branilaca i članova njihovih porodica.

4. Prijedlog Zakona o izmjenama i dopunama Zakona o penzijskom i invalidskom osiguranju Federacije BiH (predlagač: Klub zastupnika SDPBiH) – skraćeni postupak

Prijedlog Zakona utvrdio je Klub zastupnika SDPBiH.

U ime predlagača dodatno obrazloženje dao je Elvir Karajbić.

Prije otvaranja pretresa predsjedavajući je, na osnovu člana 172. stav 3. Poslovnika, kazao da se ne radi o složenom i obimnom Prijedlogu Zakona te pozvao zastupnike da se izjasne da li će se razmatrati po skraćenom postupku, što je pojedinačnim izjašnjanjem usvojeno (58 glasova za, dva glasa protiv i 14 uzdržanih glasova).

U raspravi su učestvovali Jasmina Zubić, Mensud Borović i Elvir Karajbić.

Elvir Karajbić prihvatio je sugestiju Mensuda Borovića da u članu 1. Prijedloga Zakona o izmjenama i dopunama Zakona o penzijskom i invalidskom osiguranju treba pisati: „U članu 137. u stavu 2. riječi: „do 31. decembra 2015. godine“ zamijeniti riječima: „do stupanja na snagu novog Zakona o penzijskom i invalidskom osiguranju Federacije BiH“.“.

Sa 54 glasa za, uz dva glasa protiv i uz šest uzdržanih glasova, usvojen je Prijedlog Zakona o izmjenama i dopunama Zakona o penzijskom i invalidskom osiguranju Federacije BiH.

Tačke: **5. Prijedlog Zakona o izmjeni Zakona o tržištu vrijednosnih papira** (predlagač: Dennis Gratz) – skraćeni postupak i **6. Prijedlog Zakona o izmjenama i dopunama Porodičnog zakona Federacije BiH** (predlagač Dennis Gratz) – skraćeni postupak, nisu razmatrane jer predlagač nije bio prisutan u sali.

7. Prijedlog Zakona o izmjeni i dopuni Zakona o vanparničnom postupku (predlagač: Faruk Ćupina) – skraćeni postupak

Prijedlog Zakona utvrdio je zastupnik Faruk Ćupina.

Prijedlog Zakona razmatrala su nadležna radna tijela i dostavila izvještaje.

Predlagač Faruk Ćupina dao je dodatno obrazloženje.

Prije otvaranja pretresa predsjedavajući je, na osnovu člana 172. stav 3. Poslovnika, kazao da se ne radi o složenom i obimnom Prijedlogu Zakona te pozvao zastupnike da se izjasne da li će se razmatrati po skraćenom postupku, što je pojedinačnim izjašnjanjem usvojeno (61 glas za, jedan glas protiv i dva uzdržana glasa).

U raspravi niko nije učestvovao.

Sa 56 glasova za, uz jedan glas protiv i uz dva uzdržana glasa, usvojen je Prijedlog Zakona o izmjeni i dopuni Zakona o vanparničnom postupku.

Predsjedavajući je prekinuo rad sjednice u 17.33.

NASTAVAK 23. REDOVNE SJEDNICE PREDSTAVNIČKOG DOMA PARLAMENTA FEDERACIJE BIH, održan 26.07.2017. godine

Sjednica je počela u 10.46.

Sjednici je predsjedavao predsjedavajući Predstavničkog doma Parlamenta Federacije BiH Edin Mušić.

Predsjedavajući Mušić pozdravio je zastupnice i zastupnike, članove Vlade Federacije BiH, goste kao i predstavnike akreditiranih medijskih kuća koji prate rad sjednice.

Odsustvo sa sjednice opravdali su: Ilhan Bušatlić, Alma Aranut, Rusmir Mesihović, Dževad Hodžić, Nasir Beganović, Ljuban Herceg, Boro Krišto, Bilsena Šahman i Mirsad Kukić.

Prema evidenciji Stručne službe, predsjedavajući je konstatovao da sjednici prisustvuje dovoljan broj zastupnika za kvalitetan rad i odlučivanje.

8. Prijedlog Zakona o izmjenama Zakona o suzbijanju korupcije i organiziranog kriminala u Federaciji BiH

Prijedlog Zakona utvrdila je Vlada Federacije BiH.

Prijedlog Zakona razmarala su nadležna radna tijela i dostavila izvještaje.

U raspravi su učestvovali: Elvir Karajbić, Ismet Osmanović, Dževad Adžem, Dženan Đonlagić, Damir Mašić, Mensud Borović.

Predsjedavajući je pozvao zastupnike da se izjasne o Prijedlogu Zakona. Nakon glasanja, Jozo Bagarić tražio je pojedinačno izjašnjanje.

Na osnovu pojedinačnog izjašnjanja, Prijedlog Zakona o izmjenama Zakona o suzbijanju korupcije i organiziranog kriminala u Federaciji BiH, nije usvojen (47 glasova za, 25 glasova protiv i jedan uzdržani glas).

9. Prijedlog Zakona o Fondu za zaštitu okoliša i energetske efikasnost Federacije BiH

Prijedlog Zakona utvrdila je Vlada Federacije BiH.

Prijedlog Zakona razmarala su nadležna radna tijela i dostavila izvještaje.

U ime Vlade Federacije BiH dodatno obrazloženje dala je ministrica Edita Đapo.

U ime Komisije za lokalnu samoupravu obrazlagala je Mira Grgić.

U raspravi su učestvovali: Elvir Karajbić, Jasmina Zubić, Mujo Hasić, Amra Haračić.

U ime Kluba zastupnika SBB Sanel Razić zatražio je pauzu 10 minuta.

Nakon pauze, Sanel Razić obrazložio je razloge pauze i kazao da ministrica Đapo iznese stavove u vezi sa amandmanima koji su preloženi.

Ministrica Đapo obratila se Domu i zatražila da se odloži rasprava o ovom zakonu.

Usljedila je kratka rasprava, pa je predsjedavajući pozvao zastupnike da se zaključkom izjasne da li će se rasprava o ovom prijedlogu Zakona odgoditi. Na osnovu pojedinačnog izjašnjanja, nije usvojeno da se odgodi rasprava (46 glasova za, 25 glasova protiv i jedan uzdržani glas).

Prešlo se na izjašnjanje o podnesenim amandmanima. Vlada ih nije prihvatila, a zastupnici Jasmina Zubić i Elvir Karajbić ostali su pri amandmanu.

Amandman zastupnika Jasmine Zubić i Elvira Karajbića, koji se odnosi na član 22. stav 2. i novi stav 3. nije usvojen (35 glasova za, 10 glasova protiv i 20 uzdržanih glasova).

Amandmani zastupnice Amre Haračić: Amandman I., koji se odnosi na član 9. stav 2. nije usvojen (32 glasa za, 13 glasova protiv i 18 uzdržanih glasova); Amandman II., koji se odnosi na član 18. stav 1. tačka a) nije usvojen (33 glasa za, 12 glasova protiv i 18 uzdržanih glasova) i Amandman III., koji se odnosi na član 23. novi stav 2. nije usvojen (36 glasova za, 12 glasova protiv i 16 uzdržanih glasova).

Sa 45 glasova za, uz 22 glasa protiv i uz pet uzdržanih glasova, nije usvojen Prijedlog Zakona o Fondu za zaštitu okoliša i energetska efikasnost Federacije BiH.

10. Nacrt Zakona o izmjenama i dopunama Zakona o zaštiti od požara i vatrogastvu

Nacrt Zakona utvrdila je Vlada Federacije BiH.

Nacrt Zakona razmatrala su nadležna radna tijela i dostavila izvještaje.

Zastupnicima se obratio Fahrudin Solak, direktor Federalne uprave civilne zaštite.

U raspravi su učestvovali: Jasmina Zubić, Mira Ljubijankić, Jasna Duraković-Hadžiomerović, Sanel Razić i Rasim Omerović.

U ime Kluba zastupnika SDA Safet Kešo zatražio je petominutnu pauzu radi konsultacija.

Pauza pet minuta.

Predložen je zaključak o kojem su se zastupnici izjašnjavali.

Sa 31 glasom za, uz 21 glas protiv i uz jedan uzdržani glas, usvojen je sljedeći:

Z A K L J U Č A K

Predstavnički dom Parlamenta Federacije BiH prihvata Nacrt Zakona o izmjenama i dopunama Zakona o zaštiti od požara i vatrogastvu, te smatra da može biti osnova za izradu prijedloga Zakona.

Zadužuje se predlagač da organizira i provede javnu raspravu u trajanju 60 dana.

Zadužuje se predlagač da prilikom izrade prijedloga Zakona uzme u obzir sve prijedloge, primjedbe i sugestije iznesene u raspravi kao i one koje su dostavljene ili će biti dostavljene u pisanom obliku.

11. Nacrt Zakona o izmjenama i dopunama Zakona o Javnom servisu RTV Federacije BiH (predlagači: Tomislav Martinović i Jozo Bagarić)

Nacrt Zakona utvrdili su Tomislav Martinović, delegat u Domu naroda Parlamenta Federacije BiH, i Jozo Bagarić, zastupnik u Predstavničkom domu Parlamenta Federacije BiH.

Jozo Bagarić dao je dodatno obrazloženje.

U ime Komisije za informiranje obrazlagao je Damir Mašić.

U raspravi su učestvovali: Mahir Mešalić, Damir Mašić, Mladen Bošković, Munib Jusufović, Dževad Adžem, Safet Kešo, Mira Ljubijankić, Jozo Bagarić, Dženan Đonlagić, Amela Šestić-Begović, Ismet Osmanović i Zukan Helez.

Predsjedavajući je pozvao zastupnike da se izjasne o Nacrtu Zakona o izmjenama i dopunama Zakona o Javnom servisu RTV Federacije BiH, koji nije usvojen (16 glasova za, 41 glas protiv i osam uzdržanih glasova).

12. Prijedlog Odluke o prihvatanju zaduženja po Ugovoru o zajmu između BiH i Evropske banke za obnovu i razvoj (EBRD) za realizaciju Projekta Vodovod Visoko

U ime Vlade Federacije BiH obrazloženje je dao premijer Fadil Novalić i kazao da povlači ovu tačku sa dnevnog reda.

13. Provođenje odluka Ustavnog suda BiH:

- a) **Zaključak o provođenju presude Ustavnog suda BiH broj U-20/16 od 30.03.2017. godine**
- b) **Zaključak o provođenju presude Ustavnog suda Federacije BiH broj U-15/10 od 02.12.2015. godine**

Ustavni sud je 30.03.2017. donio Odluku broj 20/16, kojom je utvrdio da odredba člana 1. Zakona o izmjenama i dopunama Zakona o izvršnom postupku Federacije BiH ("Službene novine FBiH", br. 46/16) nije u skladu s članom II.3. stav e) Ustava Federacije BiH i članom 6. stav 1. Evropske konvencije za zaštitu ljudskih prava i osnovnih sloboda.

U skladu s članom 247. Poslovnika Predstavničkog doma Parlamenta Federacije BiH, Odluka je upućena nadležnim radnim tijelima i zastupnicima.

U raspravi niko nije učestvovao.

Predsjedavajući je pozvao zastupnike da se izjasne o zaključku, kojim se zadužuje premijer Federacije BiH da u skladu s obavezama iz Ustava Federacije BiH osigura izvršenje Odluke Ustavnog suda BiH broj U-20/16 od 30.03.2017. godine, što nije usvojeno (48 glasova za, četiri glasa protiv i četiri uzdržana glasa).

Ustavni sud Federacije BiH donio je 02.12.2015. godine presudu broj 15/10 kojom je utvrdio da član 6. stav 1. u dijelu koji glasi: "kao i lice koje ispunjava pretpostavke iz stava 2. ovog člana i stav 2. istog člana te čl. 27. i 73. Zakona o notarima ("Službene novine Federacije BiH", br. 45/02) nisu u skladu s Ustavom Federacije BiH.

U skladu s članom 247. Poslovnika Predstavničkog doma Parlamenta Federacije BiH, Odluka je upućena nadležnim radnim tijelima.

Predsjedavajući je pozvao zastupnike da se izjasne o zaključku, kojim se zadužuje premijer Federacije BiH da u skladu s obavezama iz Ustava Federacije BiH osigura izvršenje Odluke Ustavnog suda BiH broj U-15/10 od 02.12.2015. godine, što nije usvojeno (49 glasova za, tri glasa protiv i sedam uzdržanih glasova).

14. Prijedlog za izglasavanje nepovjerenja Vladi Federacije BiH (grupa zastupnika)

Vlada Federacije BiH dostavila je izvještaje s mišljenjem u vezi sa ovim prijedlogom.

U ime Kluba zastupnika DF dodatno obrazloženje dao je Dženan Đonlagić.

U ime Kluba zastupnika SDPBiH dodatno obrazloženje dao je Elvir Karajbić.

U raspravi su učestvovali: Dževad Adžem, Damir Mašić, Mahir Mešalić, Safet Kešo, Munib Jusufović, Jasna Duraković-Hadžiomerović, Dževad Agić, Damir Mašić, Ismet Osmanović, Mensud Borović, Asim Kamber, Jozo Bagarić, Dženan Đonlagić, Elvir Karajbić, Alma Kratina, Munib Jusufović, Davor Vuletić, Jasmin Kadić, Zlatko Kravić, premijer Fadil Novalić i Nermin Nikšić.

Predsjedavajući je pozvao zastupnike da se izjasne o Prijedlogu za izglasavanje nepovjerenja Vladi Federacije BiH, što nije usvojeno (24 glasa za, 28 glasova protiv i dva uzdržana glasa). U vezi sa zaključkom koji predlaže zastupnik Damir Mašić (Predstavnički dom Parlamenta Federacije BiH daje podršku i povjerenje Vladi Federacije BiH), predsjedavajući je zadužio Zakonodavno-pravnu i Ustavnu komisiju Predstavničkog doma da daju svoj stav.

Po tač. 15. i 16. nije bilo materijala za razmatranje.

Predsjedavajući je zaključio rad 23. redovne sjednice u 18.41.

Transkript i prijepis transkripta sjednice čine sastavni dio Zapisnika.

v. d. SEKRETARA
PREDSTAVNIČKOG DOMA
PARLAMENTA FEDERACIJE BIH

Stela Ibrović

PREDSJEDAVAJUĆI
PREDSTAVNIČKOG DOMA
PARLAMENTA FEDERACIJE BIH

Edin Mušić

